

Maani nunatsinni ikiaroorartumik atuinerup pinaveersaartinneqarnissaanut, annikillisinneqarnissaanullu suliniutit suut aallartittariaqarnerigut, matumani aamma ikiaroorartumik nunatsinnut eqqussinissaq qanoq pitsaaliussaneripput pillugit, apeqquteqaat aallaavigalugu oqallinnissamik siunnersuut
(Inatsisartunut ilaasortaq, Karen Marie Kyed Frederiksen, Demokraatit)

Akissuteqaat

(Peqqissutsimut Inunnullu Innarluutilinnut Naalakkersuisoq)

Naalakkersuisut apeqquteqaat aallaavigalugu oqallinnissamik siunnersuut qujarullugulu pineqartup oqallisigineqarnera nuannaarutigaa.

Cannabisimik atuneq meeqqanut inuusuttunullu tarnikkut eqqarsartaatsikkullu kingunerluutaasinnaaqisoq, Cannabis inerteqqutaajunnaarsinneqarpat inuiaqatigiit peqqissusiannik isiginninneq tunngavigalugu pitsaaqutaasinnaasut aamma ajoqutaasinnaasut pillugit nassuiaammi 2024-meersumi erseqqissaatigineqarpoq¹. Cannabisimik ikiaroorartunillu sakkortuunik allanik atuinerup inunntu ataasiakkaanut inuiaqatigiinnullu tamanut tarnikkut, eqqarsartaatsikkut inuuniarnikkullu kingunerluutaasinnaanerata uppersarluugaanera asuliinnaangitsut Naalakkersuisut isigaa.

Naalakkersuisut cannabisimik ikiaroorartunillu sakkortuunik allanik eqqussuineq ilungersunartutut isigaa, suliniutillu nukittorsarniarlugit ingerlaavartumik sulissutigineqarput. Akileraartarnermut Aqutsisoqarfik amerlanerusunik ilanngaaserisussarsiornermut atortortussanillu amerlanerusunik pisiortornermut atugassanik 2018-imili aningaasaliiffigineqarnerusalerpoq, tamannalu cannabisimik ikiaroorartunillu sakkortuunik allanik arsaarinnissutaasut amerlinerannik malitseqartoq naatsorsueqqissaartarfiup kisitsisaataani tamanna erserpoq. Aningaasanik pingasuniit tallimanik ilanngaaserisussarsiorinissamut atugassanik 2025-mi aningaasanut inatsimmi immikkoortitsisoqareernikuvoq. Ilangaaserisunik aningaasanillu amerlanerusunik, tamatumani Qaqortumi Ilulissanilu mittarfitta atuuilernerisa ilutigisaannik, pisariaqartitsisoqarnersoq, Akileraartarnermut Aqutsisoqarfimmit ataavartumik nalilersorneqartarpoq. Nunattali killeqarfiini tassa nakkutilliilluni ilanngaaserisoqartartoq eqqaasitsissutigerusunnarlunilu erseqqissaatigerusunnarpoq, nakkutilliinernilu misissuinerni nassarineqartut misissugassatut politiinut ingerlateqqinneqartarput.

Pitsaaliuineq nakkutilliilluni ilanngaaserinermik suliaqarnertulli cannabisimik aannajaarniutinillu allanik atuinerup akiuinerup suliaqarnermi pingaaruteqarlunartutut Naalakkersuisut nalilerpaat. Meeqqap inuuneraniit ukialunni siullerni atugai, tamatumani isumassortimilu atassuteqarnerat kiisalu peroriartornermini sakkortuunik kingunerluutaasinnaasunillu nalaataqarsimanera ikiaroorartumik atornerluisunngornissaanut ilimanaateqarnerulersinnaaneranut aalajangiisuullunartartut, misissuinerup takutippaa². Allorfik cannabisimik pinngitsuuisinnaajunnaarnermut katsorsaanerimik siunnersuinermillu siusissukkut iliuuseqarneq aamma ilaqutariinnut inuusuttunullu tikikkuminarsaaneq ukkataralugit neqeroorutiminik annertusaalluni naleqqussaallunilu 2016-imili aallartippoq.

¹ Innuttaasut Peqqissusiannik Ilisimatusarfik (2024): *Cannabisi inerteqqutaajunnaarsinneqarpat pitsaaqutaasinnaasut aamma ajoqutaasinnaasut pillugit nassuiaat*

² Innuttaasut Peqqissusiannik Ilisimatusarfik (2021): "Ilaqutariinnut naartusortalinnut Siusissukkut Iliuuseqartarnerup" naliliivigineqarnera 2021

Nunatsinni innuttaasut peqqissuunissaannut periusissiaq, Inuuneritta III cannabisimik atuitsaaliuinerup peqqinnerulernissamik atugarissaarnerulernissamillu suliniutini ilaalluinnarneranut tunngaviuvoq. Naartusunut, ilaqutariinnullu meeraarartalinnut meeqqanullu sammivilimmik pitsaaliuineq periusissiami pingaarnertut suliniutinut ilaavoq³. Taamaammat Naalackersuisut Inuuneritta III tunngavigalugu pitsaaliuinissaq anguniarlugu siusissukkut iliuuseqartarnermut tunngasutigut pitsanngorsaaniissaq sulissutigerusuppaat, ilaatigut naartusunut tapersersuinermik isumassuinermillu suliallit suleqatiginerisigut naartullu pisinnaatitaaffeqarnissaannut inatsisiliornissamut periarfissanik misissuinikkut. Inatsit taamaattoq naartup cannabisimik ikiaroorartunillu sakkortuunik allanik innarlitsaaliorneqarnissaanut tunngavissiissaaq. Tassa naartoq innarlerneqaqqunagu inunngunnginnerani iliuuseqartoqareersimasoqartassaaq.

Suliniutaasut amerlanerpaartaat inuit ataasiakkaat pisariaqartitaannut sammiveqartut inuiaqatigiillu aaqqissuussaananerit tunngavigalugu pitsaaliuinermik suliaqarneq sammineqarpianggitsoq, Inuuneritta III-mi suliniutit pillugit nuna tamakkerlugu 2024-mi misissuinermi erserpoq⁴.

Pinaveersaartitsinissamut ataqatigiissaartumik periuseqarnissap qulakkeerneqarnissaanut tunngavoq, tassani cannabisimut ikiaroorartullu sakkortuut allanut, tupanut imigassamullu atatillugu suliniutit ataatsimoortinneqartarmata immikkut iliuuseqarfiusutut isiginiarneqangillat.

Naalackersuisut taama oqareerlutik oqallisigineqarluarnissaanik kissaassipput.

³ Inuuneritta III - Naalackersuisut meeqqat inuunerinnissaannut suleqatigiinnissamut periusissiaat 2020-2030.

⁴ Statens Institut for Folkesundhed, SDU (2026): 2018-imiit 2024-mut Kalaallit Nunaanni meeqqat peqqissusiisa aamma atugarissaarnerisa ineriartornerat